



## ADMINISTRACIÓN LOCAL

### MUNICIPAL

#### NEGREIRA

*Anuncio relativo á aprobación provisional da Ordenanza fiscal reguladora do uso de espazos, locais e instalacións municipais do Concello de Negreira*

#### ANUNCIO

O Pleno da Corporación con data de 12 de maio de 2025, acordou a aprobación provisional da Ordenanza Fiscal Reguladora do uso de espazos, locais e instalacións municipais do Concello de Negreira.

Publicada con data 19 de maio de 2025 no Boletín Oficial da Provincia e transcorrido o prazo de trinta días hábiles sen que se presentasen reclamacións, considérase aprobada definitivamente a citada Ordenanza Fiscal.

Publícase a continuación o texto íntegro da citada ordenanza reguladora.

#### ORDENANZA FISCAL REGULADORA DAS TAXAS POLO USO DE ESPAZOS, LOCAIS E INSTALACIÓNS MUNICIPAIS DO CONCELLO DO NEGREIRA

##### Artigo 1. Feito imponible

O feito imponible das taxas está constituído pola utilización e cesión do uso común especial de espazos, salas, locais ou calquera outra instalación de titularidade municipal, tanto de carácter demanial como patrimonial.

##### Artigo 2. Devindicación

Devindícase a taxa e nace a obriga de contribuír coa efectiva utilización das instalacións municipais despois de ter solicitada a preceptiva autorización.

O pagamento efectuarano os interesados na entidade financeira colaboradora, unha vez autorizada a utilización ou cesión solicitada, consonte á ordenanza correspondente e, en todo caso, con carácter previo ao inicio da actividade. O Concello expedirá o correspondente xustificante de ingreso.

##### Artigo 3. Suxeitos pasivos

Son suxeitos pasivos das taxas reguladas nesta ordenanza fiscal as persoas físicas e xurídicas ou entidades públicas ou privadas a favor das que se outorguen as preceptivas autorizacións para a utilización das instalacións municipais cuxo uso se regula na Ordenanza reguladora das condicións de uso de espazos, locais e instalacións municipais do Concello do Negreira.

Con relación á responsabilidade solidaria e subsidiaria da taxa, estarase ao establecido nos artigos 42 e 43, respectivamente, da Lei 58/2003, de 17 de decembro, Xeral Tributaria.

##### Artigo 4. Taxas

A cota da taxa regulada na presente ordenanza para actos ou actividades será a fixada nas tarifas contidas nos apartados seguintes.

###### 4.1 Taxa pola utilización dos **auditorios**.

Utilización das instalacións por entidades privadas con prezo:

- Auditorio Afonso Eáns – 100 €/hora.
- Auditorio Vello – 80 €/hora.

Utilización das instalacións por entidades privadas sen ánimo de lucro e que non supoñan custo para o público asistente :

- Auditorio Afonso Eáns – 70 €/hora.
- Auditorio Vello – 50 €/hora.

###### 4.2 Taxa pola utilización de **aulas ou sala de xuntas (“pecera”), telecentro, aula de informática ou calquera espazo análogo:**

Utilización das instalacións por entidades privadas con fin de lucro: 15 euros por hora.

Utilización das instalacións por entidades privadas sen fin de lucro: gratuíto.

#### 4.3 Taxa pola utilización da **carpa municipal**:

A) A carpa municipal só será solicitada por asociacións sen ánimo de lucro, tales como as asociacións veciñais, culturais, deportivas, ou de festexos. Non está permitido o seu uso a particulares.

B) Só poderá ser solicitada por cada asociación un máximo de **dúas veces** cada ano natural.

C) utilización da carpa municipal: 250 euros por solicitude.

#### 4.4 Taxa pola utilización das **instalacións deportivas**:

Utilización pavillón polideportivo: 20 €/hora

Utilización campo de fútbol de herba artificial de Cepelo: 50 €/hora.

Utilización das pistas de tenis e pádel: 10 €/hora.

Haberá un desconto do 50% si o suxeito pasivo pertence a algunha das escolas culturais ou deportivas do Concello de Negreira.

4.5 Taxa pola utilización dun **local social** pertencente ó Concello de Negreira: 50 €/día.

#### 4.6 Taxa polo alugueiro do local do **Refuxio de Covas**:

- Para Asociacións: 50 €/día.

- Para particulares: 30 €/día.

### Artigo 5. Normas de xestión

1.—As cotas tributarias esixibles con arranxo ás tarifas liquidaranse por cada aproveitamento solicitado ou realizado.

2.—Nas solicitudes de utilización emitírase a liquidación da taxa.

Non se consentirá ningunha utilización das instalacións ata que non se faga efectiva a liquidación e as persoas ou entidades interesadas non obteñan a autorización correspondente.

Non se poderá presentar ningunha solicitude sen a acreditación do pagamento previo.

Se se retira a solicitude antes da resolución da concesión da autorización non se esixirá pago ningún. Pola contra, unha vez concedida a autorización non se devolverá cantidade algunha, salvo causa debidamente xustificada e a criterio do Concello.

3.—Se por causas non imputables ao interesado non se puidesen utilizar as instalacións, procederá a devolución do importe abonado. Esta circunstancia non dará lugar a indemnización ou compensación económica ningunha para os solicitantes.

4.—As autorizacións de uso terán carácter persoal e non poderán ser cedidas ou subarrendadas a terceiros. O incumprimento deste mandato dará lugar á anulación da autorización, sen prexuízo das contías que lles correspondan aboar ás persoas ou entidades interesadas.

## TÍTULO IV. Responsabilidades, infraccións e sancións

### Artigo 6. Responsabilidades

Os usuarios dos espazos, locais e instalacións municipais obxecto de utilización responderán dos danos e perdas que polo seu dolo ou negligencia se ocasionen nestes. Se foren varios os ocupantes, todos eles responderán conxunta e solidariamente do pagamento dos prezos públicos, da indemnización dos danos e perdas que ocasionen nos locais, instalacións e bens que neles puidesen encontrarse e das sancións que, de ser o caso, se puidesen impoñer.

### Artigo 7. Infraccións

Son infraccións as accións ou omisión seguintes:

1.—Infraccións leves:

a) Non manter ou non deixar limpo o local ou espazo ocupado con autorización na forma establecida na presente ordenanza.

b) Non apagar todas as luces e demais aparellos que formen parte do equipamento dos espazos cedidos antes de saír.

c) O incumprimento das disposicións que regulan a utilización dos espazos, locais ou instalacións cedidos en uso cando non poidan considerarse graves ou moi graves.

## 2.—Infraccións graves:

- a) Excederse no horario autorizado.
- b) O uso das instalacións para outra finalidade distinta á autorizada.
- c) Perturbar o normal funcionamento dos servizos municipais durante os horarios de utilización.
- d) Causarlle molestias á veciñanza ou perturbar a tranquilidade da zona durante os horarios de utilización.
- e) Fumar, inxerir bebidas alcohólicas ou substancias estupefacientes nos espazos cedidos.
- f) Incurrir en tres infraccións leves.

## 3.—Infraccións moi graves:

- a) Ocupar os espazos e locais municipais sen autorización do Concello.
- b) Causar danos nos locais, nas instalacións, nos equipos e demais bens mobles que se atopen nos locais utilizados.
- c) Manipular aparellos relacionados co equipamento das salas.
- d) Reproducir as chaves de acceso aos locais.
- e) A transmisión ou cesión dos espazos cedidos en uso a outro usuario sen o consentimento do Concello.
- f) O seu uso para actividades que vulneren a legalidade.
- g) O uso dos locais e espazos para aquelas actividades que fomenten a violencia, o racismo, a xenofobia e calquera outra forma de discriminación ou que atenten contra a dignidade humana.
- h) O seu uso para aquelas actividades que impliquen crueldade ou maltrato para os animais, poidan ocasionar sufrimentos ou facelos obxecto de tratamentos antinaturais.
- i) Incurrir en tres infraccións graves.

As infraccións moi graves prescribirán aos tres anos; as graves, aos dous anos, e as leves, aos seis meses. Para o cómputo destes prazos estarase ao establecido no artigo 30 da Lei 39/2015, do 1 de outubro, do Procedemento Administrativo Común das Administracións Públicas.

### Artigo 8. Sancións

As infraccións serán sancionadas da seguinte forma:

- a) As leves, coa revogación da cesión do uso e a inhabilitación para acceder ao uso dos espazos, locais e instalacións municipais obxecto desta ordenanza polo prazo dun mes e/ou unha multa de 60 a 600 euros.
- b) As graves, coa revogación da cesión do uso e a inhabilitación para acceder ao uso dos espazos, locais e instalacións municipais obxecto desta ordenanza polo prazo dun ano e/ou multa de 601 a 1.500 euros.
- c) As moi graves, coa revogación da cesión do uso e a inhabilitación para acceder ao uso dos espazos, locais e instalacións municipais obxecto desta ordenanza desde un prazo de tres anos ata unha incapacitación absoluta, e/ou multa de 1.501 a 3.000 euros.

O tramitación do procedemento sancionador correspondente efectuarase de conformidade coa regulación prevista na Lei 39/2015, do 1 de outubro, do Procedemento Administrativo Común das Administracións Públicas.

### Artigo 9. Garantías de uso

1. A imposición de sancións é compatible coa obriga de restituír as cousas ao seu estado orixinal.
2. Cando a utilización privativa ou o aproveitamento especial leve aparelhada a destrución ou deterioración das instalacións, a persoa ou entidade beneficiaria, sen prexuízo do pagamento da taxa a que houber lugar, estará obrigada ao reintegro do custo total dos respectivos gastos de reconstrución ou reparación.
3. Se os danos fosen irreparables, o Concello será indemnizado cunha contía igual ao valor dos bens destruídos ou ao importe da deterioración dos elementos danados.
4. As indemnizacións e reintegros aos que se refire o presente artigo non poderán ser condonados total nin parcialmente.
5. A Administración poderá en calquera momento, se o considerar oportuno por razóns de interese público local, esixir o depósito previo das cantidades para lle facer fronte á posible deterioración ou destrución do dominio público municipal.

### DISPOSICIÓN ADICIONAL PRIMEIRA

O non previsto especificamente nesta ordenanza fiscal, serán de aplicación as normas contidas na Ordenanza reguladora das condicións de uso de espazos, locais e instalacións municipais do Concello de Negreira.

**DISPOSICIÓN DERROGATORIA**

A presente ordenanza derroga as ordenanzas anteriores aprobadas sobre a materia.

**DISPOSICIÓN FINAL**

A presente ordenanza entrará en vigor, tras a aprobación definitiva, o día da súa publicación no Boletín Oficial da Provincia e permanecerá en vigor ata a súa modificación ou derogación expresa.

Negreira, 01 de agosto de 2025

Manuel Ángel Leis Míguez

Alcalde – Presidente

2025/5175